

# Exposiziùn d'art ad Almen

Artistas ad artists da la regiùn Viamala en anvidos da s'apartizipar da l'exposiziùn digls 2020

■ (anr/bt) **La platafurma Kostbar anvida artistas ad artists da la regiùn Viamala da s'anunzgear par la 5avla exposiziùn d'art c'â liac igl on proxim ad Almen. Var 30 dellas a dels vignan selecciunos par exponer lur art.** L'exposiziùn d'art d'Almen e s'establida sco platafurma retschartgeada tier artistas ad artists da la regiùn Viamala. Igl grànd success, igl grànd diember d'expositurs a visitaders digls davos ons àn motivo las organisaturas *Michelle DeFalque* ad *Amanda Theiler* da cuntinuar igl project c'èara vagnieu lantscho igls 2013 da *Gina Chiara*. Las preparativas par la proxima exposiziùn àn peia antschiè.

Ella porta igl tetel general «selvadi». La 5avla exposiziùn vegn ad aver liac digls 28 da favrer antoc'igls 1. da marz 2020. Las ovras d'art anunzgeadas vi-

gnan preselecciunadas d'egna giuria par-quegl c'igl spazi e limito. Mo radund 30 exposituras ad expositurs pon mussar lur ovras ad Almen.

Igl liac d'exponer e surtut l'ustreia Landhus ca meta a disposiziùn tut igls seas locals davent da l'ustreia seza, las tgombras digl albiert antoca tigls tschalters da schurmetg, da vegn a da caschiel, la terassa ad igl curtgegn. Plenavànt stantan a disposiziùn salas an la tgea da scola, ad an la baselgia refurmada vean stagfièu egn'ovra d'art cuminevla.

## **Ear pigl program da rom pon ign s'anunzgear**

Tut quellas localitads degian inspirar artistas ad artists da far art ca va bagn a pro cun la stànza. La tgea da scola porscha spazi par radund 12 mesas noua c'artisà-



Las duas organisaturas da l'exposiziùn d'art ad Almen: Amanda Theiler a Michelle DeFalque àn antschiè cun las preparativas par la mostra digls 2020.

MAD

nas ad artisàns pon exponer a vender lur artisanadi. L'ovra cuminevla an baselgia de reunir tut las exposituras ad expositurs.

L'exposiziùn vean acumpagneada d'egn program d'ocurenzas c'â liac agl curs digls tres gis. Quegl po easser intermez musicals, szenas teatralas, sòlts, tgànt ad oter ple. Ear par que program pon ign gea uss inoltrar ideias. La sonda digls 30 da marz a las 14.00 mussa DeFalque las loacitads d'exposiziùn ad interessentas ad interessents.

La suleta cundiziùn par artistas ad artists e quella c'ì àn d'avdar an la regiùn Viamala near darivian da quella.

**Las anunzgas par s'apartizipar da l'exposiziùn d'art ad Almen en da tarmeter antoc'igls 6 da fadur ad [info@kostbar-almens](mailto:info@kostbar-almens) near par posta ad Amanda Theiler, Dorfstrasse 12, 7416 Almen.**